




tešanjski **BILTEN**

Interno informativno glasilo, Godina XVI, juni 2011. Broj 49



U ovom broju:

**Otvoren
Eminagića konak**

Obnova Musale

**Pušten u rad
Registar općinskih
administrativnih
postupaka**

**Projekti
Omladinske banke**

**Sajam privrede
Biznis 2011
Tešanj**

juni/lipanj 2011.

POSLOVNE IDEJE za MLADE

Tražite posao? Imate ideju?
Trebate Vam podrška?

IDEJA -> BIZNIS PLAN ->
PODRŠKA OPĆINE TEŠANJ ->
VLASTITI BIZNIS

**Tvoja IDEJA!
Tvoj BIZNIS!
Prijavi SE!**

Općina Tešanj Vam pomaže da
POSLOVNE IDEJE pretvorite u BIZNIS.

Javni konkurs za najbolje poslovne ideje za mlade osobe.

Prijave: 01.04.2011. do 01.08.2011. Kontakt telefon: 032 650 022, e-mail: opstenc@opcina-tesanj.ba

**tešanjski
BILTEN**

ISO 9001
BUREAU VERITAS
Certification
N° 205842

Interno informativno glasilo Općine Tešanj

Izdaje
OPĆINA TEŠANJ

Redakcija
Edina Kadušić, Ferid Mustafić, Suad Huskić,
Kanita Gredelj i Bahrudin Nočić

Glavni i odgovorni urednik
Edina Kadušić

Adresa Redakcije
Općina Tešanj, trg Alije Izetbegovica 11, 74260 Tešanj
Telefoni 032/650-341 i 032/650-022 (lokal 107),
Fax 032/650-220
E-mail press@opcina-tesanj.ba

Tiraž 2.000

Štampa
"Papir karton" d.o.o. Tuzla



**JAVNO
PREDUZEĆE
"RAD" d.d.**



Javno preduzeće "RAD" Tešanj u saradnji sa Općinom Tešanj od 1. jula 2011. će uvesti:

- **Jednosedmični odvoz otpada sa područja cijele općine**

- **Sistem odvojenog prikupljanja otpada**

- **Reciklažna ostrva**

Proširenje obuhvata odvoza otpada s područja cijele općine izvršit će se reorganizacijom postojećeg sistema odvoza na način da se na cijelom području uvođi jedinstven jednosedmični odvoz. Ovaj intenzitet odvoza zastupljen je u većini zemalja u okruženju, ali i u zemljama Evropske unije. U eri stalnog povećanja cijena goriva i energenata odvoz otpada dva puta sedmično, kako je do sada vršen u pojedinim sredinama, postao je neodrživ. Reorganizacijom će se stvoriti uslovi za proširenje obuhvata racionalnijim korištenjem postojećih resursa.

Uvođenje **reciklažnih otoka** podrazumijeva postavljanje posebnih kontejnera za papir i plastiku na za to određenim lokacijama, gdje građani mogu odlagati ovakav otpad. Ovom aktivnošću postavljaju se temelji racionalnijeg ponašanja i iskoristivost otpada.

Cijena koju građani plaćaju za uslugu odvoza otpada u direktnoj je vezi sa zapreminom odloženog otpada i bazirana je na zapremini tipske posude od 110 litara, kakve se koriste u našem sistemu prikupljanja.

Od građana se očekuje puna saradnja, posebno da se iskoristivi otpad, u ovom trenutku papir i plastika, odvajaju i odlažu u kontejnere na reciklažnim otocima, odnosno da otpad koji privremeno odlažu u tipske posude bude sabijen kako bi zauzimao što manje prostora.

U sezoni grijanja za građane koji iskažu potrebu za privremeno odlaganje pepela iz peći na čvrsto gorivo obezbijedit će se dodatna tipska posuda, a odvoz ovog otpada vršit će Komunalno preduzeće po cijeni od 1 KM sedmično, odnosno 4 KM mjesečno.

Uvjereni smo da ćemo obostranom saradnjom ispuniti postavljene ciljeve.

Općina Tešanj i JP "RAD" Tešanj

**TEŠANJ - SREDINA EKOLOŠKE SVJESTI,
ČISTOĆE I REDA**

www.opcina-tesanj.ba

OTVOREN EMINAGIĆA KONAK

Svečanim presijecanjem vrpce, Općinski načelnik Fuad Šišić, zamjenik Španskog ambasadora u BiH Toribio de Prado, pomoćnik rezidentnog predstavnika UNDP-a Armin Sirčo i predstavnik UNESCO-a Siniša Šešum otvorili su obnovljeni Eminagića konak, inače jedan od najstarijih, a

FBiH, projektatni i nadzor Ferhad Muhabegović, kao i mnogobrojni gosti.

Ovom prilikom, prigodnim govorom prisutnim su se obratili Općinski načelnik Fuad Šišić, zamjenik Ambasadora Kraljevine Španije u BiH Toribio de Prado, pomoćnik rezidentnog predstavnika UN-a Armin Sirčo,



ujedno i najljepših objekata stambene arhitekture u Tešnju.

Svečanosti su prisustvovali zamjenik Ambasadora Kraljevine Španije u BiH Toribio de Prado, predstavnici MDGF-a, predstavnici državnih, federalnih i kantonalnih nivoa vlasti, načelnici susjednih općina, predstavnici Zavoda za zaštitu spomenika

predstavnik UNESCO-a Siniša Šešum i savjetnik Federalnog ministra kulture i sporta Mirsad Mujić.

Tačna godina izgradnje Eminagića konaka nije poznata, ali se pretpostavlja da je objekat mogao biti izgrađen u prvoj polovini 19. stoljeća. Objekat je od 2005. godine na listi Nacionalnih spomenika Bosne i Hercegovine.



Poštovane dame i gospodo,

Vaša ekselencije: zamjenice ambasadora kraljevine Španije u BiH, uvaženi predstavnici međunarodnih organizacija u BiH, poštovani dužnosnici javnog i političkog života u BiH, dragi gosti, cijenjeni sugrađani

Tešanj je, definitivno, malo drugačiji. Tešanj se kreće u dobrom smjeru na temelju poduzetnosti naših građana i privrednika, na temelju naše opredjeljenosti kroz jasnu viziju: Tešanj - sredina ekološke svijesti, čistoće i reda, na temelju reforme lokalne uprave od jedne birokratske strukture ka modernoj e-upravi, na temelju spremnosti mladih da uče, da se uključe i da budu podržani na tom putu kao i na temelju opredjeljenosti da revitaliziramo naše kulturno-historijsko nasljeđe.

Danas smo u prilici otvoriti Eminagića konak, kao obnovljenu i spašenu kuću našeg prolaska kroz vrijeme. Jer mi ne svjedočimo o vremenu, nego vrijeme svjedoči o nama. Pronašli smo u Glasu komuna, regionalnim novinama od 14. oktobra 1970. godine da predsjednik Skupštine opštine Tešanj Seid Hodžić iznosi želje i planove o ugostiteljskim sadržajima u Eminagića konaku i na Gradini. Pa evo, vrijeme će svjedočiti da su vrijedni tešnjaci uz podršku bosanskih vlasti i Vlade Španije, i uz podršku velikog broja ljudi sa raznih strana koji su bili uključeni u ovaj projekat, obnovili ovaj konak koji je bio pred samim urušavanjem. Činjenica da je objekat za obnovu snimljen prije 50 godina, projektovan 1983. godine, a da se na objektu radi od 2006. godine, dovoljno govori da nam i dalje treba podrška svih vas koji ste u ovome sudjelovali kako bi završili okolinsko uređenje dvorište i prilaz objektu.

Koristim priliku da zahvalim narodu i Vladi Španije na podršci, kao i svim sudionicima ovog dugogodišnjeg uspješnog projekta a posebno Načelniku Općine u prethodnom mandatu Ademu Huskiću, zatim svim saradnicima a posebno Suadu Huskiću i Ismaru Alagiću, i naravno predstavnicima MDGFa, UNDP, UNESCO i UNICEF kao i dužnosnicima i službenicima kantonalne i federalne vlasti, Federalnom zavodu za zaštitu spomenika, nadzornom organu i izvođačima radova.

Ovdje možete vidjeti kakav je bio život u jednoj bogatijoj porodici prije 150 godina, ali ovdje možete i dušu odmoriti. Jednostavno, ovdje vam se nigdje ne žuri, jer se ovdje lijepo osjećate. Želim da takav osjećaj danas ponesete sa ovog događaja.

Općinski načelnik
Fuad Šišić

juni/lipanj 2011.

POSJETE PRIVREDNICIMA

ABIAS

Općinski načelnik Fuad Šišić sa saradnicima u okviru redovne posjete privrednicima, posjetio je i obišao firmu *Abias* d.o.o. Tešanj koja se bavi prodajom i servisiranjem svih vrsta kancelarijskih aparata. Kroz razgovor sa vlasnikom firme Senadom Brkom, Općinski načelnik je upoznat sa osnovnim informacijama o firmi, trenutnim aktivnostima i planovima za naredni period.



Nakon sastanka Općinski načelnik je u društvu vlasnika obišao i novi objekat koji je smješten u Industrijskoj zoni *Cigla* u Jelahu.

CONTESSA

U okviru posjete privrednicima, predstavnici Općine Tešanj na čelu sa Općinskim načelnikom obišli su i firmu za proizvodnju tekstila i konfekcije *Contessa* d.o.o. Tešanj. U razgovoru sa vlasnicima firme Ibrahimom Abduzaimovićem i Rizahom Ajanovićem, Općinski načelnik je upoznat sa trenutnim aktivnostima, ali i planovima za naredni period.



Imali smo priliku obići još jednu uspješnu tešanjku firmu koja radi za svjetsko tržište i poznate svjetske marke, poput *Versace*, i na licu mjesta se uvjeriti u pozitivni ambijent koji vlada u ovoj firmi, kazao je Općinski načelnik Fuad Šišić.

Tokom posjete delegacija je obišla i proizvodni pogon ove firme.

EKO SERVIS

Delegacija Općine Tešanj obišla je i firmu koja se bavi proizvodnjom, sakupljanjem, sortiranjem i recikliranjem sekundarnih sirovina *EKO servis* Tešanj. Vlasnik firme Mensur Krdžalić upoznao je delegaciju sa trenutnim aktivnostima - nabavka postrojenja za reciklažu otpadnih voda, koje će biti prvo na prostoru Bosne i Hercegovine.

Firma *EKO servis* najuspješnije provodi usvojenu viziju Tešanj sredina ekološke svijesti, čistoće i reda, a to pokazuje broj od 5000 dobavljača. Posebno me raduje vijest o nabavci novog postrojenja za reciklažu otpadnih voda, kazao je Općinski načelnik.



ARTISAN I ARTECO

U društvu predstavnika MZ Medakovo Općinski načelnik sa saradnicima posjetio je i obišao firmu *Artisan i Arteco*. Tokom posjete ovoj firmi, vlasnik Fadil Čostović upoznao je Općinskog načelnika o trenutnim aktivnostima, ali i o planovima za naredni period - uređenje Doma u Medakovu, prostora prilagođenog potrebama firme, ali i mjesne zajednice.

S obzirom na svjetsku kvalitetu proizvoda što dokazuju osvojene nagrade, firma *Artisan i Arteco* ima punu podršku Općine Tešanj, a razvoj ove firme je od interesa za cijelu lokalnu zajednicu, kazao je Općinski načelnik Fuad Šišić.



PUŠTEN U RAD ELEKTRONSKI REGISTAR OPĆINSKIH ADMINISTRATIVNIH POSTUPAKA

Početkom maja u Sali Općinskog vijeća Tešanj održana je svečanost povodom zvaničnog puštanja u rad elektronskog Registra općinskih administrativnih postupaka.

Radi se o projektu regulatorne reforme koji Općina Tešanj provodi u saradnji sa Međunarodnom finansijskom korporacijom - *IFC*, članicom grupacije Svjetske banke.



Općina Tešanj je po prvi put uspostavila elektronski Registar administrativnih postupaka koji su u nadležnosti općine i među rijetkim je u drža-

vi koja ima ovu vrstu elektronskog Registra.

Svrha elektronskog Registra je da obezbijedi transparentnost i pravnu sigurnost pravnim subjektima i fizičkim licima koja koriste usluge Općine Tešanj, ali i bolje poslovno okruženje za investitore.

Detaljnije o značaju ovog projekta je kroz kraću prezentaciju govorio



Općinski načelnik Fuad Šišić, te istakao kako će korisnici naših usluga imati neposredan uvid u to šta, kako i kada radimo pri pružanju usluga, koli-

ko to košta, te naglasio kako primjer Općine Tešanj trebaju slijediti i druge općine u Bosni i Hercegovini.

Ovom prilikom, koordinator ispred Općine Tešanj Nerminka Handžić je kroz konkretan primjer prezentirala kako izgleda jedan proces.

Svečanosti su, između ostalih prisustvovali i *IFC*-ov Projektni menadžer za Projekat regulatorne reforme u BiH Tarik Šahović, Mirjana Galonja i Suad Kulovac koji su punu godinu dana intenzivno radili sa uposlenim u općinskoj administraciji na realizaciji projekta.

Donatori koji su obezbjedili značajna sredstva za realizaciju Projekta regulatorne reforme su:

- Ured za međunarodni razvoj Ujedinjenog Kraljevstva (DFID),

- Međunarodna finansijska korporacija (*IFC*), članica grupacije Svjetske banke

i tako omogućili Općini Tešanj da brže realizuje postavljene ciljeve.

Ljeto u Tešnju 2011



3. Internacionalni kickboxing cup Tešanj 2011.
subota, 18. juni, 11,30
Sportska dvorana Tešanj

OTVARANJE MANIFESTACIJE
subota, 18. juni, 19,30
Mala sala CKO

Pozorišna predstava Vaclav Havel:
Audijencija (komedija), Altheater Sarajevo
subota, 18. juni, 20
Pozorišna dvorana CKO Tešanj

Proljeće sa sevdahom
(završni koncert), Alkatmeri Tešanj
nedjelja, 19. juni, 20
Gradina

Kreativne radionice
primijenjene umjetnosti i dizajna
četvrtak, 23. juni, 11
Eminagića konak

Promocija knjige pjesama
Kemala Ljevakovića: *Siddik*
petak, 24. juni, 19,30
Opća Biblioteka Tešanj

Street festival 2011.
srijeda, 29. juni, 18
Gradina

Tribina: "Pobune u arapskom svijetu"
Gost: Hajrudin Somun
petak, 1. juli, 19
Mala sala CKO

Pozorišna predstava
Harris Burina: *Corkan* (po djelu Ive Andrića)
Bosansko narodno pozorište Zenica
srijeda, 6. juli, 19
Pozorišna dvorana CKO

Razgovor o romanu Mirsada Sinanovića
Žrtvovanje vuku
ponedjeljak, 11. juli, 20
Opća biblioteka Tešanj

Promocija knjige Fuada Šišića
Rukovodni i menadžerski alati
četvrtak, 14. juli, 19
Mala sala CKO

Obilježavanje jubileja 65. godina Biblioteke
petak, 15. juli
Svečana akademija, 10 sati
Izložba 65. godina, 10,30 sati
Tribina o Mustafi Čemanu, 19 sati
Opća biblioteka Tešanj

Veče folklor KUD-a Pobjeda
subota, 16. juli, 20,30
Gradina

Veče sevdaha, Udruženje muzičara
"Sevdah-Te" Tešanj
srijeda, 20. juli, 19,30
Gradina

Sedmica njemačkog filma
Goethe Institut
ponedjeljak - petak, 18-22. juli
Gradina

Promocija knjige Salke Čampare i
Fuada Kovača *Izdaja i zločin*
subota, 23. juli, 18
Mala sala CKO

Otvorenje izložbe: Arheološki nalazi iz
tešanskog kraja, autori: Adnan Busuladžić
i Andrijana Providur
srijeda, 27. juli, 20
Gradina

Promocija knjige pjesama Merime Ahmić
Crni labud
četvrtak, 28. juli, 20
Opća biblioteka Tešanj

Koncert: *U susret Ramazan*
subota, 30. juli, 20,30
Sportska dvorana

juni/lipanj 2011.

AKTUELNO

OBNOVA MUSALE

U Općini Tešanj je potpisan Ugovor za sanaciju vjerskog spomenika *Musala* koji se nalazi u okviru poslovno-stambenog kompleksa *Musala* u Tešnju.

Ugovor su potpisali Općinski načelnik Fuad Šišić i Šefko Elez, vlasnik firme *ELEZ*.


Projekat se finansira iz budžeta Turističke zajednice ZDK. Završetak radova se očekuje za 60 dana.

POČETAK RADOVA

U subotu, 11. juna 2011. godine počela je sanacija vjerskog spomenika *Musala* koji se nalazi u sklopu poslovno-stambenog kompleksa *Musala* u Tešnju. *Musala* je mjesto gdje vjernici obavljaju na-

maz na otvorenom. Projekat sanacije su uradili Ahmet Čaplja i Ahmet Hundur, a izvođač radova je firma *Elez d.o.o.* Tešanj.

U Tešnju je Musala sačuvana u izvornom obliku i sa Šarenim mektebom čini jednu cjelinu, kazao je Glavni imam mr. Fuad ef. Omerbašić.



Nakon radova na Gradini, Emnagića konaku i Ferhadija džamiji ovo je još jedan projekat očuvanja kulturno-historijskog blaga. Cilj je obnova već postojeće Musale i uređenje prostora ispred, kako bi građani i posjetitelji mogli koristiti, kazao je Općinski načelnik.

Projekat se finansira iz budžeta Turističke zajednice ZDK. Završetak radova se očekuje za 60 dana.



ZAJEDNIČKI SASTANAK PREMIJERA ZDK I NAČELNIKA OPĆINA SA PODRUČJA ZDK

Općina Tešanj je bila domaćin prvog zajedničkog sastanka Premijera ZDK Fikreta Plevljaka i svih načelnika općina sa područja ZDK. Na sastanku se razgovaralo o dvije teme: Strategija razvoja Kantona i Zakon o lokalnoj samoupravi.



Razgovarali smo o dvije značajne teme koje bi u narednom periodu trebale donijeti veliku korist za sve građane, kako naše općine tako i cijelog kantona, kazao je Općinski načelnik Fuad Šišić.

Ujedinjavanjem naših snaga bit će omogućen bolji život za naše građane, kazao je Premijer ZDK Fikret Plevljak.

Tokom sastanka razgovarali smo o konkretnim problemima sa kojima se susreću sve općine u kantonu, kazao je Načelnik općine Žepče Mato Zovko.

Između ostalog, razgovarali smo i o Zakonu o državnoj službi. Delegirali smo probleme Premijeru, a on će to prosljediti nadležnim institucijama u Federaciji, kazao je Načelnik općine Kakanj Mensur Jašarspahić-Suri.

Sljedeći sastanak će biti održan u Varešu početkom augusta.



MARŠ MIRA TEŠANJ-SREBRENICA

U Sali Općinskog vijeća Tešanj 3. juna predstavljen je projekat *Marš mira Tešanj-Srebrenica 2011*. Organizator ovogodišnjeg Marša je Udruženje Klub prijatelja Srebrenice, a vođa puta je Senad Hasanbašić.

Esmir Bašić (Udruženje Kluba prijatelja Srebrenice) predstavio je ovogodišnji projekat, dok su prošlogodišnji učesnici Almir Ljevaković i Senad Hasanbašić prisutnim prenijeli iskustva i utiske.



Nadam se da ćemo ove godine imati veći broj učesnika i da ćemo na ovaj način iskazati podršku i pokazati odnos prema Srebrenici, kazao je Općinski načelnik Fuad Šišić.

Cilj projekta je, između ostalog oživljavanje sjećanja na srebreničku tragediju, podrška preživjelim i prenošenje na mlade, kazao je Esmir Bašić.

Svi koji se žele prijaviti mogu kontaktirati:

Esmir Bašić - 061 787 810

Senad Hasanbašić - 061 164 299

Rok za prijavu je 22. juni 2011. godine, a polazak je planiran za 4. juli 2011. godine ispred zgrade Općine Tešanj.



JAVNI POZIV ZA NAJBOLJE POSLOVNE IDEJE MLADIH

Javni poziv za najbolje poslovne ideje mladih usmjeren je ka poticaju mladih ljudi da sami osnivaju preduzeća ili obrt. Organizaciju ovog projekta vodi Općina Tešanj na temelju ciljeva iz strateških dokumenata Općine Tešanj. Ovim programom su definirane pojedinosti u smislu uslova za učešće na takmi-

čenju, organizacija takmičenja i načina za odabir pobjedničkih ideja kao i sklapanje ugovora za one koji odluče krenuti sa realizacijom dostavljenog biznis plana.

Detaljnije informacije pogledajte na web adresi www.opcina-tesanj.ba

EDUKACIJA MLADIH: IZRADA BIZNIS PLANA

U Sali Općinskog vijeća Tešanj 20. aprila održana je prva edukacija mladih za izradu *Biznis plana*, a u okviru Javnog poziva *Najbolje poslovne ideje za mlade ljude*.

Tokom edukacije mladima je na konkretnom primjeru popunjenog prijavnog obrasca pokazano kako popuniti aplikaciju da bi ona bila prihvatljiva. Edukaciju je održao Općinski načelnik Fuad Šišić.

Cilj je ohrabriti mlade ljude da realizuju ono što žele i krenu u izradu aplikacija, kazao je Općinski načelnik Fuad Šišić.

Početkom maja u Sali Općinskog vijeća Tešanj, kako je i planirano, održana je i druga edukacija mladih na temu Izrada biznis plana, a u okviru Javnog poziva za najbolje poslovne ideje za mlade ljude. Tokom edukacije, mladima su kroz konkretne primjere uspjeha poslovanja prezentovane mogućnosti i načini pokretanja vlastitog biznisa. Predavanju, koje je održao savjetnik Općinskog načelnika za ekonomiju Izudin Ahmetlić, inače uspješni privrednik iz Tešnja - vlasnik više firmi, prisustvovao je veliki broj mladih ljudi zainteresovanih za pokretanje vlastitog posla.

Na kraju predavanja, prisutnima se obratio i Općinski načelnik Fuad Šišić koji je još jednom naglasio kako je cilj *Općine Tešanj u povoljnom poslovnom ambijentu ohrabriti mlade ljude da realizuju ono što žele i krenu u izradu apli-*



kacija za realizaciju poslovnih ideja.

Inače, javni poziv je otvoren do 30. jula 2011. godine.

DODIJELJENI ČEKOVI ZA PROJEKTE OMLADINSKE BANKE

Potpisani su ugovori za osam projekata neformalnih grupa mladih koji su odobreni putem Omladinske banke. Ove godine Kreditni odbor Omladinske banke Tešanj primio je 21 aplikaciju, od čega je osam projekata odobreno.

O radu Kreditnog odbora, usloviima za bodavanje, ali i o samim projektima govorio je član Kreditnog odbora Omladinske banke Tešanj Esmir Kotorić.

Sretan sam što je opredjeljenje mladih ljudi sa područja općine Tešanj da sami doprinose razvoju svoje sredine, ne čekajući da neko drugi rješava njihove probleme. Među prvih pet prioriteta lokalne vlasti Općine Tešanj je i podrška mladima, kazao je Općinski načelnik Fuad Šišić.

Prisutnima se obratila i direktorica Fondacije MOZAIK Vesna Bajšenski-Agić koja je kazala kako vjeruje da su mladi ne samo budućnost, nego i sadašnjost ove zemlje, te da mogu doprinijeti rješavanju mnogih problema.

Ove godine iz budžeta Općine Tešanj i Fondacije MOZAIK, a putem Omladinske banke izdvojeno je



14.400 KM i to za projekte - *Ograđivanje fudbalskog terena Medakovo, izgradnja izletišta Mrkotić, Izgradnja igrališta mladih Vukovo, Izgradnja nadstrešne kućice Dž. Planje, Kutak za ideje mladih, Izgradnja potpornog zida Novo Selo, Sportski teren Bukva i Pokrivanje brvnare Kraševo.*

Inače, program Omladinske banke ima za cilj da poveća učešće mladih u razvoju lokalnih zajednica kroz aktivnu ulogu u procesima donošenja odlu-

ka, te pružanje podrške aktivnostima mladih u njihovim zajednicama kroz dodjelu bespovratnih novčanih sredstava projektima neformalnih grupa mladih.

Omladinskim bankama upravljaju odbori sastavljeni od deset članova u dobi od 15 do 30 godina, izabranih na javnom pozivu i edukovanih da vode program malih grantova koji direktno podržavaju jačanje povjerenja i saradnju mladih te njihove projekte.

CBS: PET MEDALJA NA BALKANSKOM PRVENSTVU

Reprezentativci BiH u kik boksu, članovi CBS Tešanj nastupili su na prvenstvu Balkana u Beogradu od 27 do 29.5.2011. godine.

Pet takmičara Centra borilačkih sportova Tešanj osvojili su ukupno pet medalja na Prvenstvu Balkana i to:

1. Lejla Fejzić, - 60 kg,
- ZLATNA MEDALJA
PRVAK BALKANA
2. Haris Mujkanović, + 94 kg,
SREBRENA MEDALJA
VICEPRVAK BALKANA
3. Jasmina Merdić, + 70 kg,
SREBRENA MEDALJA
VICEPRVAK BALKANA
4. Sumejja Jahić, - 70 kg
SREBRENA MEDALJA
VICEPRVAK BALKANA
5. Adela Fejzić, - 52 kg,
BRONZANA MEDALJA

Sa našim reprezentativcima bio je i trener CBS Tešanj Elvedin Dubravac, zaslužan za postignute rezultate takmičara na ovom prestižnom međunarodnom takmičenju.


Reprezentacija Bosne i Hercegovine je u ukupnom poretku po broju osvojenih medalja zauzela treće mjesto.



7. SAJAM PRIVREDE BIZNIS 2011. TEŠANJ

U bivšoj UKUS-ovoj zgradi u Industrijskoj zoni Bukva u Tešnju, svečanim presjecanjem vrpce, u četvrtak, 21. aprila otvoren je 7. Sajam privrede *Biznis 2011.* Tešanj.

Sajam su otvorili premijer ZDK Fikret Plevljak, Općinski načelnik Fuad Šišić i vlasnik firme AS Jelah Sulejman Hrvčić.




POSTAVLJENA MOBILNA STANICA ZA MJERENJE ZAGAĐENOSTI ZRAKA

Od strane Ministarstva za prostorno uređenje, promet i komunikacije i zaštitu okoliša ZDK, u krugu preduzeća Pobjeda dd Tešanj, je 20.5.2011. godine postavljena mobilna stanica za mjerenje indikatora zagađenosti zraka.

Stanica je instalirana na zahtjev općine Tešanj, a u skladu sa ciljem iz Strategije o uspostavljanju katastra

zagađivača. Ovo je prvi put da se na području općine Tešanj, provodi sistemsko mjerenje zagađivača zraka.

Podaci će svakodnevno biti očitavani, a mjerenja će trajati narednih mjesec dana i odnositi će se na indikatore SO₂, PM10, PM2, PM2,5, O₃, NO, NO₂ i NO_x, kao i kompletne standardne klimatološke podatke. Nosioc aktivnosti i svakodnevne koordi-



nacije sa navedenim ministarstvom je Služba CZ koja će svakodnevno preuzimati očitana mjerenja.

POSJETA PREDSTAVNIKA NORVEŠKE NARODNE POMOĆI

U mjesecu aprilu ove godine pomoćnik općinskog načelnika za civilnu zaštitu Mensur Saletović, primio je predstavnike Norveške narodne pomoći u BiH Ervina Omeragića i Seada Kličića.

Povod ove posjete je realizacija projekta čišćenja površina koje su u toku proteklog rata bile izložene dejstvom kasetne municije i naoružanja.



Općina Tešanj je u martu mjesecu na poziv Norveške narodne pomoći kandidovala pet lokacija koje su bile izložene djelovanju kasetne municije, te je izvršen obilazak istih i određene sumnjive površine.

Inače, ova aktivnost će biti provedena u tri faze.

POČELO DEMINIRANJE PROJEKTNE POVRŠINE LONČARI-BAŠIĆI

Počelo je deminiranje projektne površine Lončari-Bašići u MZ Miljanovci-Lončari. U narednih 60 dana demineri preduzeća "Tehnoelektro" doo iz Broda deminirati će površinu od 26.566,06 m² koja predstavlja I kategoriju kontaminiranosti minama.

Sredstva su osigurana kroz paritetno udvajanje sredstava općine Tešanj i "International Trust Fund for Demining and Mine Victims



Assistance" (ITF) ureda u Sarajevu u ukupnom iznosu od 90.000 KM.

U TOKU OBILJEŽAVANJE SUMNJIVIH POVRŠINA

Općina Tešanj u saradnji sa Centrom za uklanjanje mina u BiH - Regionalni ured Tuzla, u junu mjesecu provodi aktivnosti na trajnoj identifikaciji sumnjivih površina od mina. Ove aktivnosti se provode putem Općinskog koordinatora za deminiranje, a pro-

izašle su iz Strategije za dostizanje vizije - Tešanj, sredina ekološke svijesti, čistoće i reda.

Nakon ovih aktivnosti uslijedit će izrada karte sumnjivih površina sa kojom će biti poznato stanovništvo na području općine.





JAVNO PREDUZEĆE
"RAD" d.d. TEŠANJ



OD 1. JULA 2011. UVODI



- **Jednosedmični odvoz otpada sa područja cijele općine**
- **Sistem odvajanja otpada**
- **Eliminisanje divljih deponija**

**TEŠANJ – SREDINA EKOLOŠKE SVIJESTI,
ČISTOĆE I REDA**